

Hipalu

Mukia vayamoya ma avoma kae-malenea kanomo agia ohavinae. Yisasife haviya amakupi malenaya veala Yuta veamogamife huno kae-malene. Yisasia faliteno hetino ikapinaga haitegeno nago kanomoa teti foa (34) kafu agava maineno Hipalu kea kae-malene.

Anumaya Kotia nafanemoa ke tahapai-maine.

¹ Nayona mukia kanaene mukia yatetiene Anumaya Kotia agaia aune vayamogami amavayaftila taginagomo-gamina hamapai-maineane. ² Hamapai-maineaganino ani kanamo a hano higeno menia ma mopa hano hisia kanamo aupa nehigeno Anumaya Kotia agaia nafanemo avayafiti hu falote huno tahapai-maine. Anumaya Kotia ma mopaene mukia ikate yaene mopafi yaenena nafaneamo ayapiti talo hu-maleteno mukia yana nafaneamo ayapi malene. ³ Nafaneamo Anumaya Kotina tokiyaage hale yamaa agaia maineanagino Anumaya Kotiene nago avamete huana mainaageno tokiyaama hanea keleti ke huno mukia yana Male maiho. huno hu-mainele mainae. Kefo ya nehuna yatimo anonaa Yisasia aliteno ani kefo yama ali talesiafe faliteno hetino anafinaga mainea Anumaya Kotina aya tamaga kaiyaga, ala vaya mainalega, hanea siale maine.

Yisasia ensole vayala amakaseno ala kano maine.

⁴ Yisasia ensole vayala amakaseno ala kano maineanagino Nefama aminea agimoa tusia kanale agi haneno ensole vayamogami amakimona amakase-maine. ⁵ Nayona Anumaya Kotia agaifena mage higeya kae-malenayane

Kagaya nagai nafane mainananagina nagaya menia Negafana mainoe. huno hu-maineane. huya kae-malenayane. Eteno nagoene mage huno hu-maineane

Nagaya Nefana maisugeno agaya nagai nafane maigahie. huno hu-maineane.

Anumaya Kotia nago kanafina hana ensole kañomote mani kea hu-maineane? Aao nafaneamoteke hu-maineane. ⁶ Agaia yage nafanea avaleno ma mopafi elavino egeno Anumaya Kotia mani kea huno hu-maineane

Mukia nagai ensole vayamogatama agai agigeya ayetama agia alisaga hiho. huno higeya Anumaya Koti avopina kae-malenayane.

⁷ Kae-malenagi Anumaya Kotia ensole vayafena mage hu-maineane

Ensole vayala yasimoene ata anefemoene hia avamete huya aliyaamia nealiye. huno hu-maineane.

⁸ Hu-maineanagi nafaneamofena mage hu-maine Anumaya Kotiga kagaya mukia kanafina agola kava yagaika maige maige huka maigane. Kagaikaa kavama yagaisanana fatago auavateti yagaigane. ⁹ Kagaya fatago auavafekeya negahaigeno kefo auavafena nokahaiyafe nagaya kagaikaa Anumaya Kotinia Negafugamina ago amakaseka

ala kano mainane. huna masaveteti falegatogeka muse hugane.

¹⁰⁻¹² Nagoene mage huno hu-maineane

Anumayamogae ehe kanafina ma mopaene ikaene kayapiti talo hu-malenananagino ikaene mopaene fanane hugahianagi kagaya agola maige maige huka maigane. Ikaene mopaenena kenamoma falupalegeya aye kafagegiya neataleya alu kenama aliya fai nealiya avamete huka ania huganagi kagaya alua augafa kanoa omaiganagi ania huka agola maige maige huka maigane. huno Anumaya Koti avopina kae-maleneane.

¹³ Nayona Anumaya Kotia nafaneamofena mage hu-maineane

Kagaya tamaga nayatega, ala vaya mainalega, hanea siale mainesanagena kame vayakaa kaiyafi alitalu humategahue. huno higeya kae-malenayane.

Anumaya Kotia nago ensole kanomona mani kea haopaitafa huno haopaine. Nafaneamoteke mani kea hu-maineane. ¹⁴ Ensole vayala avamu mainayanagino Anumaya Kotia agaia amaku amamema ali gatisia veamogamina amaya hisi-afene huno humategeya aliyana mo nealiye.

2

Anumaya Kotima tagu tamema aligatisia yanta tusia yane.

¹ Agoma havilinona kea oagaseta taguafi maleta tokiyaage huta atafa hulineta akave malesune. ² Nayoma ensole vayamo-gami

amavayafti huhaleya hu-mainaya kea lokiyaage ke hu-mainayafe mukia taginagomoya ani kemona ali tagaea amakaveno hutageno ani kema atagae-mainaya avamete anonaamia amakata aiya yana ali-mainae.³ Naa hu-mainayafe meni kanafina Anumaya Kotia Tamaku tamamena aligatigahue. huno higeta havimainona veamogata Tamage nehie. huta hisune. Ani tagu tamema aligatisia kea Anumayamo hamapaigeya haviteya tahapaimainae. Ani yamoan tusia tokiyaage ya haneanagita takavenoma hisunana hanaa huta kefo yama hu-mainaya anonaa, tagata aisia yamona agaseta falesune? Falesuna katia omalene.⁴ Omalegi Anumaya Kotia mani kea Tamage nehie. huya hisaya yafe alu kava alu kavala huno tokiyaage avame yana huteno agaia haiya veaamo-gamina Alu Aotage Avamumo tokiya amamite amamite humaine.

Yisasia taku tamema aligatisia kanoa uhagote mainea kano maine.

⁵ Tagayama nehuna kea haenagama falote hisia mopahe nehune. Anumaya Kotia ensole vayala ani kanahe Kava yagaisaya yatele. huno hu oamatene.⁶ Hu oamatenegi Anumaya Koti avopina nago kanomoa Anumaya Kotifena mage huno kae-maleneane

Vayala naane yaga mainonageka lagaifena kagesa nehavine? Afa ya kana vaya mainonagi naa higeka tagaifena kagesa nehavine? Vayamoya tatenaya nafanehenagi naane yaga mainae huka

kava yagai nelatane? ⁷ Kagaya mage huka hutene Aupa kanafi ensole vayamoya osia kagaseya maisageka kagaya osi kano kana huka maiyo. Maigananagi haenagaa tokiyaage hale yamoene ala kagiene kamisugeka ala kano maigane. ⁸ Ala kano maineka mukia yana kava yagaika maigane. huno higeno kae-maleneane.

Tamage Anumaya Kotia Mukia yatela yagaigane. huno huteteno nagoke ya kanoa Kava yagaiyo. huno ohunegi mukia yatela Kava yagaiyo. huno hu-maineanagi tagaya meni kanafina mukia yatela kava yagaigeta noagone. ⁹ Noagonagi Yisasina agelama hu-mainone. Ensole vayamogami amaiyafinaga Yisasia osia kana kanoa maigeno Anumaya Kotia kayone yamaaleti mukia veamogatihe huno fali-maine. Fali-minea yateti Anumaya Kotia agia alisaga huno tokiyaage hale yamaa ago amine.

¹⁰ Anumaya Kotia mukia yamona aepaa maineanagino mukia yana agaia yakeya hanesiafe talo humalene. Talo hu-malegeno Yisasia tagu tamema aligatisia kanomoa fatago huno ala kano maisia yafe Anumaya Kotia Yisasina tusia agata aiya yana amigeno aliteno ani agatama aiya yateti kasagoya nafaneyagaa amavaleno agaialega amateneanagiya tokiyaage hale yapi maigahae. ¹¹ Naa hu-mainegi nagoa veafena Fatago veane mainae. huno humatenea kanoene agoma humatenea veanene nagoke neamafaa maineafe Yisasia agayea ohuno amakaifena Nagaini nagananimogatama

mainae. huno humaine. ¹² Anumaya Koti avopina mage huno hu-maineane

Nagaya kagai kagia huhalena hamapaigahue.
Veamoya melitalu hisaya amunopina
yagamefiti kagia alisaga hugahue. huno
hu-maineane.

¹³ Nagoene mage huno hu-maineane

Nagaya Anumaya Kotife nametitia hugahue.
huno hu-maineane.

Nagoene mage huno hu-maineane

Anumaya Kotima naminea nafaneyagaene main-
ogi nageho. huno kae-maleneane.

Yisasia vayatafa maineafe taya hugahie.

¹⁴ Anima nafaneyagama hiana ma mopale
veafe hu-maineanagino Yisasia Faligahue. huno
hu-maineafe agaiaenena vayatafa hapaeteno fali-
maine. Fali-mainea yateti veama hamaeno
fali neamatea tokiyaama hanea kanoa, Satani
tokiyaa ago agase-maine. ¹⁵ Agaseno fali-mainea
yateti mukia ma mopafi mainaya kanafina
veamoya falisaya yafena kolima nehaya yaami-
moa amakaila alino nofi humategeya mainageno
Yisasia ani nofipiti alino kalu hematesia yafe fali-
maine. ¹⁶ Tamage Yisasia ensole vaya amaya
hugahe ani aliyana oalinegi Apalahamu anaga
amaya hisiafe ani aliyana ali-maine. ¹⁷ Ani yafe
aganaamoyaene nago avamete huno maineno
mono notela hagote kava kano maineno Anu-
maya Kotiene veanene amunoamifi maineno
amaipa ali falu hisia kano maineanagino Anu-
maya Koti aliyana nealino ani aliyateti veafena

kalagi aimatetenno fatago aliyana nealie. Anumaya Kotia tagaya kefo yama huna yafena havino aipa haviya hulateneanagi Yisasia kefo yatihe havino falitegeno Anumaya Kotia aigetateno kefo yatia atalelatene. ¹⁸ Yisasifena Kefo yama huo. huno ayevatagama higeno haumana hale-mainea yaene augafa agatama ai-mainea yaen-ema ali-maineafe veamoya kefo yama hisaya yamo aye-mavataga hisigenoa Yisasia amaya hugahie.

3

Yisasina ala agimoa Mosesea ala agia agasemaine.

¹ Kefo yama nohaya nena fugatama Anumaya Kotia ikapinagati agaialega visaya yafe tamakaila ago ke hu-mainegi tamakaya Yisasima hulatenea yafena tamakesa havi havi hutama maiho. Yisasina Anumaya Kotia hutenea kanogino mono notela hagote kava kanoe. Anumaya Kotiene veanene amunoamifi maineanagita havita lagupi maleta tametitima nehuna kanomofe huhaleta hisune. ² Anumaya Kotia Yisasina ani aliyate ateneanagino Anumaya Kotima humainea kea akave maleme maleme haimaine. Mosesea nayona ania huno Anumaya Koti anagapi maineno Anumaya Koti humainea kea akave maleme maleme hai-maineane. ³ Veamoya nomo agia alisaga nehayanagi ani noma kimalenea kanomo agia tusiyate alisaga huya analle malenae. Naama haya yamoaa Anumaya Koti anagamoya Mosesea agia alisaga hu-mainayafe Yisasia ala neamafa maineanagino Anumaya Kotia Katea

kano mainane. huno hutegeya tusiya huya agia alisaga humainae. ⁴ Nagoke nagokemoya nona negiyanagi Anumaya Kotia mukia yana agaiage talohu-malenea kano maine. ⁵ Mosesea Anumaya Koti aliya kano maineanagino Anumaya Koti veapi maineno Anumaya Kotima hu-mainea kea havino akave maleme maleme hai-maineafe aliyamaa Nealino haenagama falote hisia kea huhaleno hamapai-maine. ⁶ Mosesea hamapaiyanagi Kalaisia Anumaya Kotina nafaneagino Anumayamo kea akave maleme maleme haino Anumaya Koti veatela kava yagaime yagaime hai-maineanagita tagaya mukia kanafina kolia ohisunagi agayama eteno evayima hisia yafena tametitima nehuta tokiya vaisunana tagaya Anumaya Koti veala fatago huta maigahune.

Anumaya Koti kema neatagayaya veamoya maifalu hisaya yaamia omalegahie.

⁷⁻⁸ Alu Aotage Avamumoa mage huno hu-maineane

Nayona Mosesema akave hu-mainaya veamoya kame kotega maineya amakaveno hunateteya nagai kea ohaviya avame hunateya aukaya hunatenaya kavala meni kanafina agai kema havinutama tamakavenona huonateho. ⁹ Kame kotega tamakinagomoya fotia (40) kafufima humainoa avame yana agayanagi nagaila tusiya huya avamekeya hunatenayane. ¹⁰ Hunatenayafe nagaya ani veafena aluya huna naipa kafa hematetena mage humainoe Mukia kanafina amakuamoa

nagai auavalala oageya kenia alitagae-minae. ¹¹ Atagayagena nagaya naipa kafa hematetena tokiyaage kea mage humainoane Amakaya maifaluma hisaya yaniafina tamagelafa huya agola uomaigahae. huna nehue. huno hu-maineane.

¹² Na yafe nena fugatama havigu nagoke nagokemogatama havitama tamakupi malenaya kea neataletama kefo ya hutama haegafa huno mainea Anumaya Kotina tamakaveno huteyafenagi kava yagaiho. ¹³ Kava neyagaitama Anumaya Kotia Meni kanae. huno malegeno ani kanamoan hanegi havigu nagokemogatama kefo yamofena Hagaage yane. huka hisanageno ayegavataga hinageka Anumaya Kotina kakaveno huteyafenagi mukia kanafina nelama fugamina amaku amakesa ali hetiya maisaya kegeya hamapaiho. ¹⁴ Tagaya Yisasife havita lagupi malenonanagi menia ania huta lagupi malenona yana atafa huta lokiyaage hulineta ani yaenema mo falinuta Kalaisiene ailokaeta maigahune.

¹⁵ Tagaya ago havimainone mani kehena mage huno hu-maineane

Meni kanafima nagai kema havisayana nayona tamakina-gomoya amakavenoma hunate-naya avamete hutama lamakavenona hu onateho.

¹⁶ Nayona taya Anumaya Koti kea haviteya amakavenona hutena? Mukia Isaleli veala Mosesea amavaleno vigeya Isipi kumala ataleya umaineya ani kavala hu-mainayane. ¹⁷ Fotia

(40) kafufina Anumaya Kotia tagamife aipa kafa hemateneane? Anumaya Kotia mukia Isaleli veamoya kame kotega kefo yama hutuya faligeno amaugafamoanani kame kotegama hanea veaneahe aipa kafa humateneane.¹⁸ Anumaya Kotia tagamife agaia lokiyaage kea huno Nagaila maifalu hisaya yaniafina agola uomaigahae. huno hu-maineane? Ani kema atagae-mainaya veafe hu-maineane.¹⁹ Tagaya ago havimainone agaife haviya amakupi maleya amametitima ohunaya veala Anumaya Kotina maifalu hisaya yamaafina agola uomaigahae huno hu-maineane.

4

Anumaya Koti veamoya maifalu hisaya yana aligahae.

¹ Anumaya Kotia Maifalu hisaya yaniafina uomaigahae. huno hu lokiya vai-malenea kemoa menia afaa hanegi havigu Anumaya Kotia tamakesigetama nagoa veala ani yapi maisaya yafena kosa he otamatesigetama omaisaya yafena koli hiho. ² Tagaya nayoma Isaleli veamoya kema havimainaya avamete huta Yisasi kanale mono kea nehavunanagi amakaya kanale mono kea haviyanagi haviya amakupina omalageno ani kemoa amaya ohuneane. ³ Amaya ohunegi tagaya Anumaya Kotifena havita lagupi maleta lametiti hu-mainona veamogata maifalu hisuna yapina haigahune. Nayona Anumaya Kotina amakaveno hutenaya veafena mage huno hu-maineane

Nahai-vaigena hulokiya vaina tamage nehue naga ya maifalu hisaya yama malenoa yapina agola omaitafa huya omaigahae. huno hu-maineane.

Hu-maineanagi Anumaya Kotia nayona ma mopama talo hu-maletegeno aliyamaamo hano hu-maineane. ⁴ Nago kaiyaga Anumaya Kotia agaia avopina seveni (7) molia kanahe mage higeya kae-malenayane.

Anumaya Kotia mukia aliyamaa aligeno hano hutegeni seveni (7) molia kanale maifalu hu-maineane. huno hu-maineane.

⁵ Ani avomoa nagoene mage hu-maineane

Amakaya maifalu hisaya yaniafina agola uomaitafa hugahae. huno hu-maineane.

⁶ Hu-maineanagi mukia nayo veamoya Anumaya Koti kanale mono kea haviteyagi akave omalennayafe maifalu hisaya yapina uomainagi menia nagoa veamoya umaigahae. ⁷ Umaiwaya yafe Anumaya Kotia eteno nago kanaa maleneno ani kanahena Menima mainona kanae. huno malene. Kasagoya kafumoa euno amakasetegeno Anumaya Kotia Teviti avayafiti nayoma humainea avamete kea mage huno humaineane

Meni kanafima agai kema havinutama tamakavenona hu oateho. huno hu-maineane.

⁸ Nayona Mosese anonaa Yosuaa hetinoma mainea kanafima maifalu hisaya yama amamineleasina Anumaya Kotia haenagaa Teviti avayafitila alu kanahena ohuneleasine. ⁹ Naa humaineafe Anumaya Koti kema nehaviya veala Sapati kanamo hia avamete huno hanea yapi

maifalu hisaya yana hane. ¹⁰ Haneanagiya veamoya Anumaya Kotima amaminea yana maifalu hisaya yapima visayaamoa Anumaya Kotia nayona aliyama ali hano hu-maleteno maifalu humainea avamete huya amakaiami aliyana ataleya maifalu huya maigahae. ¹¹ Anima maifalu hisuna yapima umaisuna yafena taula ofaeta tokiyaage huta visune. Havigu nayo veamoya hu-mainaya avamete kava huta Anumaya Koti kea akave omalesunana anima maifalu hisuna yapina uomaigahune.

¹² Anumayamoa haimuene ke haneanagino tokiyaage huno aliyana nealie. Ani kemoa naepe kayomona avema aluga alugama nehanea naepe-mona agaseno aluya huno avenenela humaine. Anumaya Koti kema veamogata havunageno lagupima laviana amegati mopale yafema muse nehuna tagu tameene Anumaya Kotifema havita tametiti hu-mainona tagupiene tavino alipanese. Taiya auaene tayamufafi nehanea taunufiene tavino alipanese. Ani kema tagu tagesamoa nehavia yaene hayema nehia yaene kanale kava nehaagi kefo ya nehaagi huno ali fako nehie. ¹³ Mukia Anumaya Koti talo hu-malenea yamoagai aufina fala okigahianagino mukia tagupima hanea yamo Anumaya Koti aufina fufu yate hale-maineanagino tahavi-gesigeta tagaya mukia yama nehuna yamo aepaa hapaigahune.

Yisasia ikapinaga hanea mono notela veamogatina hagote kava kanoti maine.

¹⁴ Yisasia ala mono notela hagote kava kanogino, Anumaya Kotiene veamogatiene

amunotifi maineno falu hu nelitea kanoa, Anumaya Koti nafanegino ikapinaga hai-maineanagita agaifena tametitima huta hu falote nehuna yana atafa huta tokiya vailisune. ¹⁵ Kefo yama ohisuna tokiyatia omalenegi tagai mono notela hagote kava kanotimoa hauna hulatesia kano maineanagino tagaitema mukia Kefo yana hiho. huno aye lavataga nehia yamo a hagoteno agaila ago ayevataga hu-maineanagi kefo yana ohutafa huno ohuneane. ¹⁶ Naa hu-maineafe tagaya kayone hisuna yamaa hanea Anumayamotegama havigegahena kolia ohisunagi avate visunageno kefo yama nehuna yafena kalagi ailateno kana yama tagaipima hanesiana kayone hisuna yamaa nelamino taya hugahie.

5

Yisasia mono notela hagote kava kanogino tagu tamema aligatisia himamua tamage huno hane.

¹ Mono notela hagote kava vayala maa huya ali hetimatae. Ani kanoa aka kano vayaamoyaene mainegeya veama hamamaesiafene huya ali hetitageno Anumaya Kotiene veanene amunoamifi maineno Anumaya Kotina muse yamaa neamino veamoya kefo yama hagenoa sipi sipi heno Anumaya Kotitega kae-salamana hu neateane. ² Ani kanomoa kefo yama hisia tokiyaa omale kano maineno kema ohaviya veanene Anumaya Koti katema neatalaya veanenefena kea oamamakino ako huno kea hamanepaiyane. ³ Agaia kefo

yamaahe huno Anumaya Kotima ali-talesiafe sipi
sipa heno kae-salamana huteteno anile mukia
veamoya nehaya kefo yama alitalesiafene huno
Anumaya Kotitega sipi sipia heno kae-salamana
hu neateane.⁴ Mono note hagote kava kanomona
agi hanea aliyanagiya veamoya amakaiamige Ani
aliyana aligahune. huya ohunagi nayona Anu-
maya Kotia hagoteno Elonina mono note kava
aliya alisia yafe alino hetitenea avamete huno
meni kanafima mainaya vayapitila alino heti
neamate.

⁵ Alino hetineamatea kava huno Kalaisienena
agaia Nagia anala hanea kano mainoanagina
mono notela hagote kava kano maigahue. huno
ohunegi Anumaya Kotia agaia Mono notela kava
kano maiyo. huno ani aliylate aliheti neateno
Anumaya Kotia mage huno hapaipy

Kagaya nagai nafane mainanagena menia na-
gaya Negafana mainoe. huno humaineane.

⁶ Nagoene Anumaya Koti avopina mage huno hu-
maineane

Kagaya mono note kava kanoa, Melikisetekia
nayona mono note kava kanomo hu-
mainea avamete huka agola ani aliylate
maige maige hugane. huno hu-maineane.

⁷ Yisasia ma mopafi maineno Anumaya
Kotitega ke huno havige-maine. Augafama
aligatisia tokiyaama hanea Anumaya Kotitega ala
kefiti ke huno falisia yafena havinegeno tusiya
avia neategeno aunumoa hu-maineanagi agaia
haiya avamete kavala ohunegi Anumaya Kotina
haisia kemona havina akave maletena aiyafinaga
maigahue. huno hu-maineafe Anumaya Kotia

havigea kea havimaine. ⁸ Havitegeno Yisasia Anumaya Koti nafane maineanagi augafa agatama aiya yateti Anumaya Koti kema akave malesia yana age-maine. ⁹ Ageteno akave malelea yamo ala kanoa hapaemaineanagiya agai kema akave maleya ali hipoya hisaya veamogamina agola maige maige hisaya yamoene amaugafa aligatisia yamoene aepaa maine. ¹⁰ Anumaya Kotia mage huno hutene Kagaya Melikisetekima humainea avamete huka mono notela hagote kava kano maigane. huno hutene.

Nute nafanemo avametela huta omaisune.

¹¹ Kasagoya kea haneanagi hanaa huta tamahapaisune? Tamakaila tamaku tamakesamoa havilama nohigetama none nane nehageta tagaya ya humaita humaita tamavanelune. ¹² Tamakaya huge amavelige hisaya veanema maisaya kanatamia ago falote humaineanagi tamaku tamakesamoa havilama ohia yafe nago kanomoa eteno nagoene Anumaya Kotifena avoya kea hagotetama tamakupi malenaya kea eteno huge tamave-lige hugahie. Tamakaya tokiya kavela onenagi numaage nena. ¹³ Mukia veamoya numaage nesayana osi nafane kana huya maineya fatago kavama hisuna yafema tamahapauna kea nohaviye. ¹⁴ Nohavigi tokiyaage kavela ala veamogami kavele. Ani veamoya amakaiami kefo auava yafeene fatago auava yafeenena fako huya ageteya kanale auava yana akave nemalae.

6

Tagaya tokiyaage huta maineta Anumaya Kotia alino kanale hulatesiafe agava maisune.

1-2 Kalaisifema hagoteya huge huge humainaya kehena neataleta ko hu-mainaya veane maisune. Havigu noma atafa nehia posiage ayete yete hu-maleta maisunana nona falote ohugahie. Ma augafa kea atalesune. Fali lavata hisuna kefo yana haneanagita neataleta tagua aiyahae huta Anumaya Kotife havita lagupi malenona kene amaugafale amaya maleya tima fale neamataya kene fali-mainaya veamoya hetisageno Anumaya Kotia kaiyakea humateteno nofi humatesigeya anifi agola amakata aisia no maime haigahae huno humainea kene ani keyagafina omaitafa huta omaisune. Ko huta ala veanema maisune. ³ Anumaya Kotia tayama hisigetahena ani kavala higetao. Ko huta ala veala maisune. ⁴⁻⁵ Nagoa veamoya Anumaya Koti hale yapina ago emaineza ikapinagati emainea muse yana ago aliteya tusia muse nehageno Alu Aotage Avamumoa amakupina ago emainegeya ani veamoya Anumaya Koti kema haviyana kanaleya huno hamamaegeya haenagama falote hisia kanamo tokiya yamaa ago neagae. ⁶ Ani yama age-mainaya veamoya Anumaya Kotina amakaveno huteteya mukia keama atalesayana eteya amakua aiyahae hisaya kaamia omaleneanagiya amakaiami Anumaya Koti nafenemofena Falisie. huya yafaga yosalela nagoene maiya haeya neasaiya agaye hisifa yana nagoene maiya nehae.

⁷⁻⁸ Mukia veala mopa kana huya mainageno ani mopamona Anumaya Kotia muse yana kola amigeno mukia kanafina aino ani mopafina lavigeno ani mopafima hu-malenea hoyafima hanea kavela mukia veane hamamaesia yafe hageanagi ani mopafima avetanafaage inoma hagesigenofena aupaa Havi mopae. huno ata kaeno asagaligahie.

⁹ Nahau nayamopafi nenahaiya nena fugatama menia manima hua kemoa tusia kana ya nelamamuanagi nagaya tamakaifena ago havimainoe Anumaya Kotina lamakavenoma hu neataya kavala ohugahagi Anumaya Kotia tamaya huno tamaku tamamema aligati-mainea avamete kava hugahae huna nehue. ¹⁰ Tamakaya Yisasina tamakuama amitafa hutetama agaia anagamogamima amaya humainaya yana menia nagoene ani kavala nehae. Anumaya Kotia fatago kano maineanagino ani aliyatamia neageno agela nokaneanagino anonaa tamamigahie. ¹¹ Naama haya yafena nenahaigi mukia kanafina tamakaya aniageya hutama tamahaote tamahaote aliyana nealitama tamakupima malenaya yana atafa hu lokiya vai-linetama Anumaya Kotima tamavalesia yafena tamametitia huge huge nehisageno me lamavalesie. ¹² Tamakaya alige atalegela ohiho. Anumaya Kotima tamavalesia yafena tamametitia hiho. Yisasife haviya amakupi malenaya veamoya nehaya avamete hutama akave maleho. Ani veamoya Yisasife haviya amakupi maleya amametiti huteya Naa yama hulamategahue. huno humainea yafena mailava

huya maineya aliyana nealiyafe ani kavakeya hutama hiho.

Anumaya Kotima hulokiya vai-malenea kele tametitia hisune.

¹³⁻¹⁴ Nayona Anumaya Kotia Apalahamufena Naa yama hugategahue. huno hulokiya vaite-nea kanafina nago kanomoa Anumaya Kotina oagaseneanagino Anumaya Kotia agaia agile Nevayanae. huno tokiyaage kea mage huno hu-maineane Tamagelafa huna nehuanagina mukia kanale yana kagaila kamisugeya kagai kaginago-moya tusia vaya kahaeya aitagu-fegahae. huno hu-maineane. ¹⁵ Hu-maineanagino Apalahamua mailava huno agava maineno Anumaya Kotima Kamigahue. huno manuma aminea manua al-imaine. ¹⁶ Nagoa veamoya Anumaya Koti au-finagita tamagelafa nehune. huya nehaya kemona amakaseno hai-mainea kanomo agilefe ani kea nehae. Veamoya kema nevaisageno nago kanomoa Anumaya Koti aufinagina tamagelafa nehue. huno hisigeyahena nagoa veamoya kea ohuya maigahae. ¹⁷ Anumaya Kotia Apala-hamufeene Isaleli veanenefena hu lokiyyama vai-malea kehena Etena alu kea ohugahue. huno hu-maineanagiya ani kema havisaya yafe Anumaya Koti aufina tamagelafa nehue. huno humaineane. ¹⁸ Ani lole kea, hu lokiyyama vai-malenea kene Anumaya Koti aufina tam-agelafa nehue. huno humainea kene oatalegahie. Ani kea hanenageno eteno alu kea ohugahie. Anumaya Kotia havigea ohugahiafe ani kemoa haneanagita Anumaya Koti avatema

faleta umainona veamogatina tametitia atafa hulineta tamena male falu huta maineta haenaga taugafama aligatisia yafe agava maineta mailava huta tametitia nehune. ¹⁹ Anumaya Kotia Naa hulamategahue. huno humainea tametiti yamo tagu tamena aligatisia yanagino nofi kana huno ikapinaga haitegeno nago kena asai-maleteya asama hu-malenafinaga alu aotage nopinagagino haino atafa huligeno tokiyaage humaine. ²⁰ Hu-maineanagino Yisasia tagai taya hugahe hagoteno ani ikapinaga hanea nopinaga haifale-maineanagita tagaya haenaga haigahune. Yisasia Melikiseteki humainea avamete huno mono notela hagote kava kano maineanagino agola maige maige huno ani aliyatela aligahie.

7

Melikisetekia ala agi hanea kanoe.

¹ Apalahamua kasagoya sauve vayayagaene tua huno hamaeno falimateteno kumaalega eteno ugahe vilegati Melikisetekiene katega mo fotu humaine. Ani Melikisetekia Salemu kumate sauve kano maineanagino, mukia yana amakaseno hai-mainea Anumaya Koti mono note kava kanogino Apalahamuene katega mo fotu huteno kanale manua amine. ² Amitegeno Apalahamua tuma hifiti alia afenona alitalu huteno tenia (10) hetama vai-malefiti nago hetama Melikisetekina amine. Melikisetekie agimoa tagai kefina Fatago kavakeya nehia sauve kanoe. huno humaine. Salemu kumale haya agimoa tagai kefina Aipamoa falu humainea sauve kanoe. huya

hu-mainayane. ³ Melikisetekina itaafoamogani anakiene aginagomogami amakiene atenea kanaene fali-mainea kanaheenena Anumaya Koti avopina okaenagi Anumaya Koti nafanemo avamete huno mono note kava kanogino agola maige maige huno nemaiyane.

⁴ Tamakaya tamakesa haviho ani Melikisetekia ala kano maineanagino Apalahamua hagote laginagomoa tuma hu-mainefti ali-mainea afenona tenia (10) hetama vai-malefti nago hetama Melikisetekina amineane.

⁵ Livai anagapiti mono note kava vayala ali hetimatageya mainaya vayamogamina Isaleli vayamoya kahegi kea akave maleya malenaya yapitila tenia (10) hetamafiti nagoke hetama neamafugamina amaminayanagi ani vayamoya Apalahamu nafaneyaga mainayanagiya amakaiami neamafuya mainayane. ⁶ Mainayanagino Melikisetekia Livai anagapitila falote ohunegi Apalahamua tenia (10) hetamafitila nagoke hetama amigeno Anumaya Kotia Kanale yama hugategahue. huno huteneanagino Apalahamuna Melikisetekia kanale manua amineane.

⁷ Amineanagita tagaya ago havimainone manuma aminea kanomoa analé haino maigeno manuma ali-mainea kanomoa agai aiyafinaga osi vaya kana huno maine. Naa hu-maineafe Melikisetekia Apalahamuna agaseno ala kano maine. ⁸ Tenia (10) hetama malenafitila nagoke hetama mono note kava vayamoya ali-mainaya vayala fali vayakeya mainagi Melikisetekia tenia (10) hetamafitima nagoke hetama kanoa ali-mainea konomofena

Anumaya Koti avopina Agaya ofalino afaa maine. huno hu-maineane. ⁹⁻¹⁰ Melikisetekia Apalahamuene kategama mo fotu huteno tenia (10) hetamafitima nagoke hetama aminea kanafina Livaia falote ohunegi Apalahamuna augafafinaga mainea kanafinagita tagaya mage huta hugahune Livaia, nagoke hetama ali-mainea kanogino Apalahamuma nagoke hetama Melikisetekima amineana Livaia Apalahamu augafafinaga mainegeno amineane.

Haegafa mono note kava kanomoa nayo mono note kava vayamogamina amakase-maine.

¹¹ Anumaya Koti kahegi keleti Livai nofi vayala mono note kava vayale huya ali het-imatageya ani vayamoya mono note aliyana nealiya sipi sipia hageno kolamaamo takilavia yateti Anumaya Kotia mukia veafena Fatago veane mainae. huno hu-maineleasina alu kava kanoa falote ohileasinagi Yisasia ago falote huno Melikiseteki avamete hu-mainegi Eloni nofi vaya avametela ohune. ¹² Nagi hagote mono note kava vayamogamima amatalesayana kahegi keamienena neataleyaa alua kahegi kemo akave malegahae. ¹³ Mani kema humainea kanoa, Anumayatimoa alu nofi kano mainegi nagoa vayamoya agaia nofi vayapitila mono notela kava vayala omainayane. ¹⁴ Omainayanagita tagaya ago havimainone Anumayatimoa Yuta nofi vayapiti falote hu-maineanagino Mosesea ani nofi vayafena Mono notela kava vaya maiho. huno hu oamateneane.

¹⁵ Haegafa mono note kava kanoa, Yisasia, alu kanogino Melikisetekiene nago avamete huno falotema hiana Livai nofi vayala mono note kava aliyamona ago amakase-mainea yafena ago havilinone. ¹⁶ Kahegi kemo akave maleya Livai nofi vayapitila mono note kava aliyana ali-mainayanagi Yisasia hano ohisia haimumo tokiyaleti hetino mono note kava aliyana ali-maine. ¹⁷ Anumaya Koti avopina Yisasifena mage hu-maineane

Kagaya mono note kava kanoa agola ani aliyatela maige maige huka Melikiseteki avamete huka maigane. huno hu-maineane.

¹⁸⁻¹⁹ Nayoma hanea kahegi kemoa tayama hisia tokiyaa omalegeno ago ali-talene. Veamoya ani kahegi kema mukia akave malesaya tokiyaamia omalegeya Anumaya Koti aufina fatago veanea omainayanagino Anumaya Kotia menia tusia kanale tametiti hisuna katia ago valilateneanagita ani kateti Anumaya Koti avatela neone.

²⁰ Anumaya Kotia Yisasifena Mono note kava kano maiyo. huno afaa alino heti oatenegi Nagaya nevayanae tamagelafa huna ali heti negatoe. huno humaine. Hu-maineanagi nayona veamoya Mono note kava vaya maiho. huya ali hetimatenaya kanafina Anumaya Koti aufina tamagelafa huta ali heti nelamatone. huya ohunayane. ²¹ Ohunagi Anumaya Kotia agaia Nevayanae. huteno Yisasina mono note kava kanoa ali hetiteteno mage huno hapai-maineane Anumayamoa mage huno humaine Nevayanae tamagelafa huna kahanepauve kagaya

mono note kava kanoa agola maige maige huka maigane. huno hu-maineanagino agu agesa aiyahae huno alu kea ohugahie. huno hu-maineane.

²² Hu-maineafe tagayama havisunana Yisasia kefo yatihe huno faliteno heti-mainea yateti Anumaya Kotia alino haegafa hagelafi-latenea kemoa nayoma alino hagelafi matenea kemona agase-maine.

²³ Mono note kava vayala nayona kasagoya mainayanagiya ago falitageya alu vayamoya ani aliyaamia ali-mainayafe kasagoya ani aliya vayala mainayane. ²⁴ Mainayanagi Yisasia agola ofaligahianagino haimuene kanogino mono note kava kanoa agola maige maige huno maigahie. ²⁵ Maineno Anumaya Koti avatema neaya veanema hamamaesia yafena mukia kanafina Anumaya Kotitega ke huno havinegeafe mukiamoya agai agilema Anumaya Koti avatema neaya veamogamina amaku amamena ali negatie.

²⁶ Yisasia mono notela hagote kava kanogino alu aotage kano maineanagino nagoke kanoa kefo yamaa omale kanoe. Aguafina oniya yamaa omaleneanagino kefo yama nehaya veala amakasegeno ame analo avaleno ategeno maineafe kanaleya huno taya nehie. ²⁷ Nayona mono notela hagote kava vayamoya mukia kanafina sipi sipi heya kae-salamana huya Anumaya Kotina neamiyane. Neamiya hagoteya amakaiami kefo yaamima ali-talesiafene huya Anumaya Kotina amiteya anile mukia veamogami kefo yaamima ali-taleseafene huya

haenaga aminayane. Aminayanagi Yisasia agaia kefo yamaa omaleanagi nagoke yupa kanoa veamogami kefo yafene huno yafaga yosale fali-minea yupa agaia augafa hakino Anumaya Kotina amitenno kae-salamana huteneane.
²⁸ Nayona kahegi kemoa mukia kanafina kefo yama ohisaya tokiyaamima omalenea veamogamifena Mono notela hagote kava vaya maiho. huno alino hetimateneanagi haenagaa Anumaya Kotia tamagelafa huno Nevayanae. huno hu lokiya vaiteno agaia nafanehena Mono notela kava kano maiyo. huno ali hetiteneanagino ani kanomo agupina fatago yamoia hiya huno kosa hetegeno maineanagino aniageya huno agola maige hugahie.

8

Yisasia hagote mono kava kanoa ikapinaga maine.

¹ Manima hua kemo aepamoa maa humaine tagaila mono notela hagote kava kanotia, Anumaya Kotiene veamogatiene amunotifi maineno yuna helatesia kano maineanagino ikapinagama haiyana Anumaya Kotina tamaga kaiyagaa hanea siale kava vaya mainalaga maine. ² Maineanagino Anumaya Kotina alu aotage nomaafi maineno aliyana nealie. Ani nona Anumaya Koti alu aotage notafamaa haneanagino veamoya okinagi Anumaya Kotia agaia kimalene.

³ Mono notela hagote kava vayala ali hetimatageya Anumaya Kotina muse yamaaene sipi sipiene heya kae-salamana hutena. Hutayanagi

Yisasienena nago muse yana amigahe higeya yafaga yosale nili heya asaigeno ani muse yana agaia augafa hakino amine. ⁴ Mono note kava vayala Livai nofi vayalagiya kahegi kea akave maleya Anumaya Kotina muse yaamia aminayanagino Yisasia ma mopafi maineleansina mono note kava kanoa omaileasinagi ikapinaga maineno ani aliyana maino nealie. ⁵ Mono note kava vayamoya mopafi maineya aliya aliyamoia Anumaya Kotina ikapinaga hanea mono nomona amemaa kana huya taveli-mainae. Ani yafe Mosesea kenaleti mono noma kigahema higenoa Anumaya Kotia mage huno hapai-maineane Kagaya agoyafima kaveli-mainoa yana agelama huteka mukia yana aniageya huka talo huo. huno hu-maineane.

⁶ Higeno Kalaisia aliyamoia mopafi maineya mono aliya vayamogami aliyana amakase-maine. Yisasia Anumaya Kotiene mopafi veanene amunotifi maineanagino Anumaya Kotiene alino hagelafi-latene. Ani haegafa kemoa nayoma alino hagelafi-matenea kemona agase-maine. Menia Anumaya Kotia Tusia kanale yama hulamategahue. huno huteno haegafama hulokiya vai-maleneanagino nayona Ma yama hulamategahue. huno humainea kemona ago agase-maine.

Haegafama alino hagelafi-latenea kemoa hagotenoma alino hagelafi-matenea kemona akase-maine.

⁷ Hagotenoma alino hagelafi-matenea kemona veamoya akave malesaya tokiyaamima hane-

leasina Anumaya Kotia haegafama alino hagelafiliatesia kea ohileasine. ⁸ Ohileasinagi Anumaya Kotia veamoya kanale kavama ohaya kavaamia ali falote humateno mage huno hu-maineane

Haenagaa nago kanafina Isaleli nofi veanene Yuta vea omainaya veanene haegafa alina hagelafi-matesua kea hugahue. ⁹ Isipi kotegeti Isaleli veamogami amakinagomogamina amavalena uaamona nagola hagelafi-mate kea hamapauvanagi ani kea akave omalaya yafe Tamahaote yatamie. hunu nakaveno humatenoane. Humatetena menia haegafa kema hisua kemoa nayo kemoma humainea avametela ohugahie. ¹⁰ Ani kanamoaa hano hutesigena Isaleli veamogamina haegafa alina hagelafi-matesua kea amamigahue. Ani kemoa maa humaine kahegi kenia amakesafinaga maletena amakupinaga kae-maletena Anumaya Kotiami maisugeya nagai nafaneyaga maigahae. ¹¹ Ani kanafina mukia veamoya osi veanene ala kava vayaene nagaifena havilama hugahayanagiya nagoke nagoke veamoya neamafuyaene amakanaamimoyaenefena Anumayamofena havilama hutama haviho. huya hamaopaigahae. ¹² Na yafe nagaya kefo yaamia aigeamatena atalematetena nagoene ohavigahuanagina nagekani-talegahue. huno Anumayamoa hu-maineane.

¹³ Menima alino hagelafi-matenea kemofena

Haegafa ke. huno humaineafe hagotenoma alino hagelafi-matenea kemoa ago atafalemaineanagino hano hutafa hugahie.

9

Mono notela hagote kava vayamoya sipi sipimo kolateti kae-salamana hu neatayane.

¹ Anima hagoteno alino hagelafi-matenea kefina Anumaya Koti agima alisaga huya ayegeyege hisaya yafeene ma mopafi hanea alu aotage mononofena kahegi kea maleneane ² Ani yugu nomoa maa huno hane. Kumategati hai nefalaya nopina aivasa hisia alamuene Anumayamoma amisaya maya alu aotage kaihame kana maya nemalaya folamoene hanegeno ani nofena Alu aotage none. huya hu-mainayane. ³ Ani yugu nopina kenaleti anal maleya asa hu-maleneya nago kaiyaga hunalagi-maleneya ame kaiyaghena Tusiya huno alu aotage none. huya hu-mainae. ⁴ Ani nopina kanileta yafana miyamaamoa hai-mainea yafateti talo hu-malenaya folamo haneanagiya ani folamole kimamufa kana huno manaage yana negayaya folamoe. Anile Anumaya Kotia alino hagelafi-matenea kema hanea pokisia haneane. Ani pokisia kanileta yafateti talo hugagi-male pokisie. Ani pokisimo agupinaga Eloni ayopalema agusasi aye-mainea ayopaene Anumaya Kotia nayoma alino hagelafi-matenea kema kae-malenaya yafatalaene kanileta yafateti talo humale keayola haneane. Ani keayopina ikapinagati elavimainea kavemo agia manae huno haneane. ⁵ Ani

pokisimo avayalela kafuahe kafuahena nagoke yupu veamoya Anumaya Kotia kefo yatima aye hamisafene. huya hageno mono notela hagote kava kanomoa sipi sipimo kolana alino ailake-take hunemaleane. Ai-laketake hu nemalea avayalela tole kanileta yafateti talo humalenaya yana ensole vaya kana kanolatanagino Anumaya Koti tokiyaage hale yamaa tavelisia kanolatanagiana auvaiana mainaanagina menia ani yamona aepaa hufalote huna ohugahue.

⁶ Ani yayaga talo tala hu-maleteya mono note kava vayamoya mukia kanafina kumategati hai nefaleya nemaiya nopi haiya aliyaamia alimainae. ⁷ Alimainayanagi mono notela hagote kava kanomoa agaiage noagupinaga analema kenaleti asa hu-maleneyu hunalagi-malageno ame kaiyaga kafuahe kafuahena nagoke yupu kanoa unefaleane. Havigua afaa novianagi sipi sipimo kolaene alino nehaiyane. Ani kolana agaiama kefo yama humainea yama aye hamisafene huno pokisilela ailake-take hu-maleteno haenaga mukia veamogami kefo yaamima Anumaya Kotia aye hamisafene huno ani kolana alino taki-maine. ⁸ Naama humainea yafena Alu Aotage Avamumoa maa huno tave-nelie kenaleti anala asa hu-maleneyu ame kaiyaga nopolaga afa vayamoya nohaiyanagino ani kanafina vayamoya Anumaya Koti avatela hai-falesaya kaamia yaufa ovalineane. ⁹ Naama humainea yamoavame yanagino meni kanafima maineta havisuna kea taveli-maine. Veamoya muse yama neamiya kefo yaamima aye hamisafene huya sipi sipia heya Anumaya

Kotina aminayanagi mukia ani veamogami amakula alino fatago hu oamatenea yafena taveli-maine. ¹⁰ Taveli-maineanagi Anumaya Kotia haegafa kea yaufama ali falote ohunea kanafina hagotenoa ani kanafima hanea kahegi kemoa amega amaugafamofekeya huya kavema nenaya yaene tima nenaya yaene amaugafalema tima nefalaya yafeene humaine.

Yisasia falia kolamo kefo yatia agola aye hamitalene.

¹¹ Kalaisia ago evayi huno mono notela hagote kava kano maisiafe ikapinaga hanea nona, tusiya huno alu aotage nona, nayo nomona agase-mainea nopinaga, haifale-maineno taminea kanale yatela yagai-maine. Ani nona ma mopafi nona omaleneanagiya mopafi vayamoya ani nona okinae. ¹² Ani alu aotage nopina Yisasima haiyana mememo kolaene pulamaka nafanemo kolaene alino ohainegi agaia kolamaa nagoke yupa ailaki-maleteno hai-maine. Kefo yatimo aigagi-lateneanagi ani yapiti agola tavalesiafene huno miya hulateteno agaia kolana ailaki-malenlo hai-maine. ¹³ Nayona Isaleli veala fali-mainaya veamogami amaugafaleene kele amamu amale-mainea veamogami amaugafaleene amatafa haya yamo Anumaya Koti aufina amaugafamona alino oniyaage humainae. Higeya mono note kava vayamoya mememo kolaene ve pulamakamo kolaene a pulamakaene heykae-salamana huya atafi kaeteya tanefaene aliya anima oniyaage humainea amaugafale aihatali hatali humatageno Anumaya Koti aufina

amega amaugafamoa kanale hu-maineane.
¹⁴ Ani yamoamega amaugafamona alino kanale humateanagi Kalaisi kolamoahulateneayanagino tusa huno agase-maine. Kalaisia kefо yamaa omaleneanagino agola maige maige nehia Alu Aotage Avamumoa aya higeno agaia augafa hakino Anumaya Kotina amine. Amineafe agaia kolamoahamega taugafaageya aye ohaminegitagufima hanea kefо yamoatahaeno falilatesia kefо yana, aye hamitalegetatagaya menia maige maige huno mainea Anumaya Koti aliya veane mainone.

Kalaisi kolamoahae alino hagelafi-lateneayamona ali lokiya vai-malene.

¹⁵ Mukia Anumaya Kotia kema higeya agaialegama umainaya veafena Anumaya Kotia Maa tamahaimu tamamigahue. huno humaineanagino maige maige hisaya hamaimu alisayafene huno Kalaisia Anumaya Kotiene veanene amunotifi maineno haegafama alino hagelafila-tenea kemona ali lokiya vai-malene. Nayoma alino hagelafi-matenea kema akave malenaya veamoya kefо yama hu-mainaya yaamimoa aigagimategaya mainaya nofipiti amavayu hisiafe miyana ataleno Kalaisia falmaine.

¹⁶ Nago kanomoafaligahema nehunoa manua amino Falisugetamahena ma yania aligahae. huno hu lokiya vai-maleneanagi ani kanomaovalisigeyahena oaligahae. ¹⁷ Oaligahagi veama falisageyahena hu lokiya vai-malenaya keamimoa tamage huno falote nehie. Anima

hu lokiya vai-malenaya kema humalenesaya veama ofaliya afaama maisayana hu lokiya vai-malenaya keamimoa afa ya kana hugahie. ¹⁸ Ani yamo aepamoa maa humaine sipi sipia hegeno faligeno ani sipi sipimo kolamo taki-lavigeno hagotenoma alino hagelafi-matenea kemoa falote huno tamage hu-maineane. ¹⁹ Nayona Mosesea mukia kahegi kea mukia veala hamapaiteno pulamaka nafanemo kolaene mememo kolaene titafaene ali havigu huteno nagola manaage inomo agia hisopua aliteno hisopulela sipi sipimo ayolagefa hiku kana huno maleno kiteno kahegi kemo avoene veanene hisopuleti kolapina ayeteno aihatali hatali humate humate hu-maineane. ²⁰ Naa nehuno mage huno hu-maineane Ani kolamo Anumaya Kotima alino hagelafi-lamatenea kemona alino tamagegeyama hisiafene huna takinelamatogi ani kemona akave maleho. huno hu-maineane. ²¹ Ania huno Mosesea kolana alino yuguletima kimale mono noteene ani nopima aliyama nealiya yayagaleene aihatali hatali hu-maleneane. ²² E, kahegi kemoa mage huno hu-maineane Kasagoya yamo oniyaagema humainea yana kolateti alino aye haminageno oniya ohugahie. Kolamo takema hu otavineleasina Anumaya Kotia kefo yatia agetateno atale oatateleasine.

Yisasia kefo yatima aye hamि-talesiafene huno augafa hakino fali-maine.

²³ Ma mopafi yama ikapinaga hanea yamo avame ya kana hu-maineanagino ani yayagama aye hamि-talesiafe sipi sipia hageno kolamaleti

aye hami-taleneanagi pipi pipi kolamoa ikapinaga hanea yana aye hami oatalegahigi nayo yamona agase-mainea yana Yisasi kolatetike ikapinaga hanea yana aye hami-talene. ²⁴ Ikapinaga tama notafama tavelisia avame ya kana mono nona, ma mopafi veamoya amayateti kimalenaya mono nopina Kalaisia hai ofalenegi ikapinaga tama notafapi fatago huno hai fale-maine. Hai faleno maineno menia Anumaya Koti aufina tagaima taya hisia yafe maine. ²⁵ Kafuahe kafuahena mono notela hagote kava kanomoa Anumaya Kotifema muse hutegahena kolana alino alu aotage nopina hai-maine. Ani kolana agaia kola nomagi Yisasia kafuahe kafuahema agaia fali-mainea kolana alino ikapinaga ohainegi nagoke yupu kanoa faliteno agaia kolana amine. ²⁶ Kalaisia kafuahe kafuahema amileasina mukia kana-fina ehema Anumaya Kotia ma mopama talo humalenea kanaleti aepa heno augafa agata aino falige falige hileasinagi. Aao menia ma mopama hano hisia kanamo aupa nehigeno Kalaisia nagoke kana kanoale ma mopafina falote huno tagaila kefo yatima ali-talesia yafe agaia fali-maine. ²⁷ Ania huno Anumaya Kotia Mukia veanea nagoke yupu kanoa falitesagena kaiyekea humategahue. huno humaine. ²⁸ Ania huno Kalaisia nagoke yupu kanoa kasagoya veamogami kefo yaamima aye hami-talesia yafe faliteno agaia kolana Anumaya Kotina amine. Amineanagino haenagaama eteno enunofena kefo yatima ali-talesia yafena omegahigi agai agavama nemaisaya veamogami amaugafa ali-gatisia yafe egahie.

10

*Nayona afuma hey a Anumayamoma muse
yama neamiya yamo kefo yatia ali oatalegahie.*

¹ Mosese kahegi kemoa kanale yana haenagama falote hisia yamo avame ya kana huno laveli-maineanagi ani kahegi kemoa ani kanale yana omalene. Omaleneanagino kahegi kemoa Anumaya Kotifena kafuahe kafuahe nagoke augafa kava hutama sipi sipia hetama amiho. huno hu-maineanagi ani yamo Anumaya Kotitegama neaya veamogamina alino kanale hu oamateneane. ² Sipi sipima hey a kolamaa takiyaamoma veamogamina alino kanale humatenleasina eteya nagoenena nago sipi sipia hey a kolana ai otakileasine. Anumaya Koti agima alisaga nehaya veamogamina hagote kanafina sipi sipi hey a ailakiya kolamo kefo yaamima ayehami-taleneleasina Ayenio nagupina kefo yania hanea yafe kana ya nemamie. huya ohaleasine. ³ Ohaleasinagi kafuahe kafuahena afuma hey a kolamaa ailaki-mainaya kanafina Nagoene kefo yatia hane. huya hu-mainayane. ⁴ Aepaamoa maa humaine ve pulamakamo kolamoene mememo kolamoenena tamagelafa huno kefo yana aye hamie oataleneane.

⁵ Ani yafena Kalaisia ma mopafima emainea kanafina Anumaya Kotifena mage huno hu-maineane

Muse yaene afuma hey a kolamaa takiya negamiya yafeenema okahainagenahena nago ya kamisua yafene huka nagai

naugafa talo hu-malenane. ⁶ Afuyaga mukia atafi kaesagali-taleya negamiya muse yaene kefo yama aye hamisiafene huya afuma heya kolamaa takiya negamiya yaenefena kagaila okahaune.

⁷ Nagaya Yisasina anile mage huna nehue Veha Anumaya Kotiga nagaya ago emainoe. Nayona nagaife huya avopina kae-malenaya kemoa falote hisiafene huna nagaya kagaima kahaisia yana hugahe ago emainoe. huno hu-maineane.

⁸ Kahegi kemoa Maa hiho. huno humainea kehe Yisasia hagoteno mage humaine Anumaya Kotiga muse yaenema afuma heya kolamaa takiya negamiya kavafeene afuyagama mukia atafi kaesagaliya negamiya kavaenefena oka-haigeka musena nohane. huno humaineane.

⁹ Hutenoagi nagoene mage humaine Anumaya Kotiga nagaya kagaima kahaisia kavala hugahe emainoe. huno hu-maineane. Ani kema humainea kemoa hagote auava yana ali neataleno haegafama falote hia yamona alino tokiyaage huno ali heti-malene. ¹⁰ Naa hu-maineafe Anumaya Kotina nehaiya yanagino, maa humaine Yisasi Kalaisia nagoke yupu kanoa agaia augafama hakino amiteno fali-mainea yateti tagaya ma mopafi veamogatina kefo yatia aye hamitalegeta tagaya agaila alu aotage veanea menia mainone.

Yisasia fali-mainea yateti kefo yatia agola aye hamitalelere.

¹¹ Mukia mono note kava vayamoya kanaaene kanaaene hetiya aliyaamia nealiya afua heya

kolana takime lakime hai-mainayanagi ani yamoa kefo yaamia ali oataleneane. ¹² Ali oatalenegi Kalaisia nagoke yupa kanoa augafa hakino Anumaya Kotina amiteno fali-mainea kolamo a agola mukia kanafima nehaya kefo yana aye hamitalegeno Anumaya Kotina tamaga kaiyagaa ala vaya mainalega hanea siale haino maine. ¹³ Maineno Anumaya Kotia kame vayaama aiyafinaga amatesigeya Kame hugatonageka tagase-mainana kanomogae. huya hisayafe agava maine. ¹⁴ Nagoke yupa kanoa faliteno Anumaya Kotina kolamaa aminea yateti mukia alu aotage auava yama hisaya tokiyama amaminea veafena Fatago kavakeya hutama agola maige maige hisaya veane mainae. huno humatene.

¹⁵ Alu Aotage Avamumoa ani kelamage kea hagoteno mage huno tahapai-maine

¹⁶ Anumayamoa mage huno hu-maineane Haena-gaa amakaila haegafa alina hagelafimate-sua kea amamitena nagainia kahegi kea amakupinaga maletena amaku amakesafi-naga kae-malegahue. huno hu-maineane.

¹⁷ Nagoene mage huno hu-maineane

Kefo yaamiheene kema neatagayaya yaamiene-fena havina nagekani-talegahue. huno hu-maineane.

¹⁸ Anumaya Kotia kefo yatihem aige-tateno atalelatenea yafena nagoene kefo yama aye hamitalesie huya afua heya kolamaa takisaya aliyan omalene.

Tagaya tametiti huteta Anumaya Koti avatela umaigetao.

19-20 Nayona vayamoya mono nopina kenaleti asa hunalagi-maleteya Ame kaiyaga alu aotage nopinagagitama ohaigahae. huya humainayanagi Yissasia ani kena aye hatata huno hai fale-maine. Anima aye hatata humainea kenamo a ma humaine. Agaia augafagino ania huno aye hatata hu-maleteno katia vali-malene. Menia ani haegafa katia tahaimuma tamisia kapinagita Anumaya Kotitegama ke huta havigesunafe hai falegahune. Naa hu-maineafe nafunagana-gatama Yisasi kolamo ayenalagi-malenaya kena ago ayehatata hu-maleneanagita Anumaya Kotima mainea alu aotage nopina kolia ohuta afaa hai falegahune. 21 Yissasia mono notela ala kava kanoti maineno Anumaya Koti veamogatia kava yagai nelate. 22 Na yafe tole lagesa ohavita Anumaya Kotife havita lagupi maleta tametiti hu-mainonafe taugafamona nunu alagaage humainea titeti sese hu-lateneanagita Anumaya Koti avatela umaigetao. Yisasi kolateti tagupina aihatali hatali hu-malegeno oniyaagela ohuneanagita tagupina Kefo yama huna yamo a hane. huta havita kana hisuna yana ago ali-talene. 23 Anumaya Kotia Maa yama humlamategahue. huno hu lokiya vai-malenea kemoa ani yana tamage huno hugahie. Tamage huno humaineafe tametitia nehune. huta hu falote nehuna kehena tole lagesa ohavisunagi tokiya vaita atafa hu-lisune. 24 Tagesa havi havi huta tafutagana-gamifena hamau amayamopafi hamaisia yafeene kayone kavama hisaya yafeene ali het-

imatesunageya tagaila ania huya ali hetilate-sae. ²⁵ Yisasi kema havigahema tafu-taganayaene melitaluma nehuna yana oatalesune. Nagoa veamoya ago atalenayanagi tagaya oatalesune. Yisasia eteno kaiyekema me hulatesia kanamo a ago aupa hu-mainegi melitalu hutama Tamaku tamamena ali lokiya vaitama maiho. huta hamapaisune.

Anumaya Koti nafanea takavenona hu oatesune.

²⁶⁻²⁷ Anumaya Kotina kelamageama havilama hutetagi eteta neataleta Nahaiya kava hugahuema. nehuta kefo yama hume hume nevisunagenofena nago kanoa eteya haesageno falinageno kolamaamo a taki lavisia yamoa ani kefo yatia nagoene aye hamisia aliyan a omalegi. Anumaya Kotia kame vayaamogamina tusia atafi amatesigeno teno fanane hisigeya hikanufa vaigahayafe Anumaya Kotia kaiyekema hulatesia yafena tusiya huta kolia hisune. ²⁸ Nagoa veamoya Moses kahegi kema ali tagayageyahena tole vayapi tagufa (3) vayamoyafi ageteyama hu falote hutayana ani veafena hamauna hu oamateya hamayageya fali-mainayane. ²⁹ Fali-mainagi tamakaya na tamakesa nehaviye? Anumaya Koti nafanemofema amakaveno huteteya ali haviyama hutenaya veamoya alisaya anonaamia tusia kana yana haneanagiya aligahae. Kalaisima fali-mainea kolamo a alino hagelafi-latenea kemona aepaa hanea yafena nagoa veamoya alu aotage veale huya hu neamatayanagi ani

veamoya ani kolafena Afa yane. huya huteteya kayonema hisuna yama nelamia Alu Aotage Avamumona hu-haviya hu neatayanagiya anonaamia aligahae. Mosese kahegi kema ali neatagayaya veamogamina amakaseya tusia havi kayo aligahae. ³⁰ Anumaya Kotina tagaya age-mainonagino mage huno hu-maineane Kefo yama nehaya veamogamina anonaamia kayoma amamisua yana nagainia yane. Nagoene mage hu-maineane Anumayamona nagaini veamogamina nagainia kaiyekea humatetena alina fako hugahue. huno hu-maineane. ³¹ Haimua hanea Anumaya Kotia kaiyekea hulateno kayo kevema tamisia yafena tusia koli hisuna yana hane.

Tametitile hetita lokiyaage hisune.

³² Nayona Yisasi kanale mono kema havitageno aye halelamategetama mainageno kana yama falote higetama tusia kana yana aliyanagi mai lokiya vaitama mainae. Ani kavama hu-mainaya yafena tamakesa ali hao hutama maiho. ³³ Nagoa kanafina mukia veamogami amaufina tamakia hu-haviya nehuya tamakaila ali haviya hulamatene. Naa nehuya nagoa kanafina ania huya havi kavama humataya nelamafu-gamima amaya hisaya yafena nagopi ailokaetama mainetama ani kana yana ali-mainae. ³⁴ Ali-mainagi Yisasi kema havilinaya anagala amavaley anofipi amatagetama amakaifena tamahau humatetama amaya nehageno kame vayamoya ayaamoya nagoa afeno yatamima musufayama hagetama mage nehae Afa yanagi

tagaiti yana tusia yanagino ikapinaga hanege hanege hisia yatia hane. hutama muse yapi nemaiyane. ³⁵ Nemaiyafe menia tamakupima malenaya yana oataletama tamakuamoa kolia ohisigetama tokiyaage hutama maiho. Naama hutama maisayana Anumaya Kotia muse huteno tusia muse hisaya yana tamamigahie. ³⁶ Tamamigahianagi ako hutama mai lokiya vaitama mainetama Anumaya Kotina haisia kavakeyama hisayana Anumaya Kotia Ma yama hulamategahue. huno hu lokiya vai-malenea yana hulamategahie. ³⁷ Ani yafena Anumaya Koti avopina mage huno kae-maleneane

Anima esia kanomoa aupa kanafi ago egahie.

Agava omaigahianagino aupa kanafi ago egahie. ³⁸ Anumaya Kotia mage huno hu-maineane Fatago veane mainae. huna humatenoa veamoya nagaifema haviya amakupi maleya amametiti humainaya yateti mai kanale huya maigahae. Maigahayanagi etenoma koli huno nagai kema atalesimofena musena hu oategahue. huno higeya avopina kae-malenayane.

³⁹ Tagaya koli huta agai kea ataleta agola tau-gafa tagata aisia ata tegelege hisia kumate visuna veanea omainonagi Yisasife havita lagupi nemalonanagino tagu tamena aligatisigeta agola maisuna veane mainone.

11

Tametiti yamona aepeaae.

¹ Anumayamofema havita lagupi maleta lametiti hu-mainona yamo a maa humaine Tagaitima tametiti nehuna yana aligahune. Noagona yana haneanagita tamage agegahune. huno humaine. ² Nayona veamoya haviya amakupi maleya amametiti hu-mainayateti Anumaya Kotia Kanale veane mainae. huno humateneane.

³ Havita lagupi maleta lametiti hu-mainona yamo a maa humaine Anumaya Kotia ke ne-higeno ikaene mopaene falote humaine. huta ago havilinone. Oagetafa hu-mainona yateti menima neagona yana talo humalene huta tagupina malenone.

*Epoloaagi Inokuagi Noaagi huya
Anumayamote amametitia humainae.*

⁴ Epoloa Anumaya Kotife havino agupi maleno ametiti humainea yateti kanaleya huno Anumaya Kotina sipi sipia heno kae-salamana huno amigeno Anumaya Kotifema havino agupi malenea yafena Anumayamoa Kanale ya hane. Fatago kano mainane huna hu negatoe. huno hu-maineane. Epoloa nayona maineno fali-maineanagi Anumaya Kotife havino agupi malenea yamo a meni kanafina ani kehena tahane-paiye.

⁵ Inokua Anumaya Kotife havino agupi malenea yateti Anumaya Kotia Havigu faliyafene. huno avalegeno ikapinaga hai-maineane. Haitegeya mukia veamoya Inokufena atiyegetayana Anumaya Kotia ago avalegeno vigeya augafa oagenae. Inokua afama mainea

kanafina Anumaya Koti aufina haiya kavakeya hu-maineane. huya humainae. ⁶ Anumaya Koti avatema nevaya veamoya hagoteya ma kea haviya amakupi maleya amametitia hisae Tamage huno Anumaya Kotia maineanagino havigesuna yana tamigahie. huya hisae. Hugahayanagi agaifema haviya amametitima ohisaya veamogamifena musena nohie.

⁷ Anumaya Kotia Noana haenagama falote hisia yana, Noaa oagenea yafema hapaigenoa Tamage nehane. huno amayo aiteno havino agupi maleno ametiti huteno agaia afamo kanoa hamaoke hesiafene huno Anumaya Koti kea akave maleno tipi kalea talo humaine. Naa hu-maineafe Anumaya Kotifema havino ametitima hia yana Anumaya Kotia ageteno Fatago kano mainane. huno huteneane. Huteneanagino mukia ma mopafi mainaya veamoya Anumayamofema haviya amakupi omalaya auavaamia Noaa ali fufute maletegeno Anumayamoa ani veamogamifena Kefo ya humainae. huno anonaamia amamigeya fali-maine.

*Apalahamugani Salagania Anumayamote
anametiti humainae.*

⁸ Anumaya Kotia Apalahamufena mage huno humaine Kumakaa neataleka kamisua mopalega vuo. huno higeno Apalahamua ani mopalegama visia kamona oageneanagi Anumayamoa kea havino agupi maleno ametiti huteno akave maleno hetino umaine. ⁹ Anumaya Kotima Kamigahue. huno humainea kehena havino

ametiti huteno ani mopale umaineno natu veamoya nehaya kava huno kanale nona kino omainegi yugu no kino maine. Anumaya Kotia Na mopa tamamigahue. huno hulokiya vai-malenea mopale nafaneamoa Aisakiene agehoamoa Yekopuene ania huya yugu no kimaleya mainayane. ¹⁰ Anumaya Kotia agesa haviteno tokiyaage noyaga hanege hanege hisia posileti ikapinaga kimalene. Ki-maleneanagino Apalahamua ani kumafena tusiya huno agesa havi havi huteno Ani noyagafi umaigahuanagina afaa menia yugu nopi maigahue. huno humaineane.

¹¹ Higeno aamoa Salae namo a maineanagino Anumaya Kotia Nafanekaa ategane. huno hulokiya vaino huteanagi Apalahamua kosuna leno maineanagi ani kehena Tamage hanafe hana yana afaa hugane. huno havino agupi maleno ametiti hu-maineafe nafanea atene. ¹² Ategeno Apalahamua kosuna leteno ago faligahe hianagi agaipiti aginagomoya ohavunamaa veane ateya aitagufageno ikatema hanea kanefiyagamo hia avamete hutefa ti kahaepamoma hia avamete huya ohavunamaa veane aitagufe-mainae.

¹³ Ani veamoya Anumaya Kotima hulokiya vaino Tamamigahue. huno humainea yana oaliya afaa haviya amametitia nehuya fali-mainae. Ani yana oalinagi alualega hanegeya afaa maineya amakesa haviya musena humainae. Musena nehuya Natu veane kana huta afaa yoka ma mopalela mainone. huya nehuya mainae. ¹⁴ Ani kema humainaya veamoya mage huya humainae

Haenagaa haegafa kumatile haita maisuna yafe tamametitia nehuta agava mainone. huya humainae. ¹⁵ Hayanagi Apalahamuma ataleno emainea mopa aepaahema mani kema hileasina eteya maiyahae huya valeasine. ¹⁶ Valeasinagi ani mopahena ohunagi ikapinaga visaya kanale kumafe tusiya huno hamaigeya humaine. Hamaigeya Anumaya Kotifena Anumayatimo maine. huya hageno Anumaya Kotia ani kehena havigeno aipamoa kanale higeno ikapinaga kanale kumaamia talo humatene.

¹⁷⁻¹⁸ Anumaya Kotia hulokiya vaino Apalahamufe mage huno humaine Aisakipiti kagai veala kasagoya veane falote hugahae. huno humaine. Nagi Anumaya Kotia Apalahamufena Hisua kea havisio? huno avame huteno mage hie Kagaikaa nafanea heka kae-salamana hunato. huno hapaiyanagi Anumaya Kotia Naa yama kamigahue. huno hu lokiya vai-malenea kea Apalahamua havino ametiti hu-maineafe Aisakina aiya nagoke nafaneamona heno kae-salamana hutegahe humaine. ¹⁹ Huteno Apalahamua mage huno agesa havie Anumaya Kotia tusia tokiyaaene kano maineanagino fali-mainesifitila ali hetitesia tokiyaa hane. huno huteno haegahe nehigeno Anumaya Kotia ke higeno atalene. Ataleneafe tagaya avame kema havisunana Aisakia ago fali-mainefti ali hetitene huta hugahune.

*Aisakiene Yekopuene Yosefeene Anumayamote
ametitia humainae.*

20 Aisakia Anumaya Kotife havino ametitima hia yafe Yekopugani Isoganitema haenagaa falote hisia yafe huno manua anamine.

21 Yekopua kosuna leno faligahe hia kanafinagi Anumayamo kea havino ametiti hia yafe ayoppaale aivasaga huno ape hu-maineno Anumaya Kotifena muse huteno aginagomogania, Yosefe nafanelatana, manua anamine.

22 Yosefea falisia kanamoaa aupa higeno Anumayamo kea havino ametitima humainea yafe vayaamo-gamina mage huno hamapaiye Anumaya Kotia Isipiti Isaleli veama amavaleno visigeyahena nayamufama vati huya aliyama visayana Anumaya Kotima tamamisia mopale mo hevainateho. huno hamapai-maineane.

Mosesea Anumayamote ametitia humaine.

23 Mosesena ita-afaoamogania kanale nafane ateteana muse haanagi Isipi sauve kanomoaa Ne nafaneyaga hamaeho. huno hia kehena kolia ohuana Anumayamo kema haviana anakupi maleana anametiti hu-mainaa yafe tagufa (3) ikana ani nafanea fala-kiteana mainae.

24 Maiageno Mosesea maineno ko hutegeya mage hae Isipi Sauve kanomo munamo nafane maine. Felona agehoamoe. huya hisaya yafena ohaigeno Anumaya Kotifena havino agupi maleno ametitia humainea yafe mage huno humaine Nagaya agai nafanea omainoe. huno humaine. **25** Huteno agesa havigeno Isipi vayaene mainena kefo yamoaa aupaa fanane hisia muse yana ohisue. huno hie. Huteno Nagaini anagala, Anumaya Koti anagaene umainesugeya

Isipi vayamoya ali haviya humatesaya avamete huya nagaila ali haviyama hunatesayana kanalene huna hugahue. huno humaine. ²⁶ Huteno Isipi vayamogamina mukia kanale-nale yaamia kasago haneanagi Mosesea ani yafena agesa ohavinegi Afa ya kana yane. huno neataleno Anumaya Koti anagaene mainena Kalaisima ali haviya hutesaya avamete kava huya nagaila ali haviya hu-natesagena kanalene huna hugahue. huno nehuno Anumaya Kotia haenagama kanale yama amisia yafe agesa havino maine.

²⁷ Mosesea Isipitima ugahema hiana Anumaya Kotife havino ametiti humainea yafe kava kanomoa hai vaiteanagi kolia ohunegi tagaya taulagamoa oagenea Anumaya Kotina agemegeme haisia avamete huno kolia ohuno maineno tokiya vaino maine. ²⁸ Anumaya Kotia Isaleli veafena mage huno hamapaiye Ensole kanomoa Isipi veamogami yage ne nafaneyagaamia hamaegahie. Tamakaila otamahae-sia yafe sipi sipia hetama kolamaa fiate fale-malenegeno tamakai ne nafaneyaga amakaseno ohamaesie. huno higeno Mosesea ani kea havino ametiti huteno ani kemo akave maleno Isaleli veala hamapaigeya ania humainae.

Kasagoya Isaleli veamoya tokiyaage amametitia humainae.

²⁹ Isaleli veamoya Isipi mopaleti ataleya Haesa titema ayana haviya amametiti hu-mainaya yafe Anumaya Kotia higeno ani limoa aluga luga hetimainegeya hau hu-mainea mopa kana higeya ani

lina afaa takaeya vayanagi Isipi vayamoya amanatiya Ani lina takaesune. huya hayanagi aluga lugama heti-mainea timoa eteno meli-nakaigeya fali hano humainae.

³⁰ Isaleli veamoya Anumayamofe haviya amametiti haya yafe Yeliko kumate uvayima hayana sevenia (7) yupu kagi kagi nehageno yafatetima hu-malenaya kegiyamoagagaia tagape ailavi-maine. ³¹ Nagi Yeliko kumate veamoya Anumaya Koti kea haviya amakaveno hutenaya yafe Isaleli vayamoya amakasageya fali hano hayanagi nagola kumai yate vai neaya amo agia Lehapue ani yupu ofaline. Ani amoanumaya Koti kea havino agupi maleno ametiti hia yafe Isaleli vayamoya yaufa neeyatole kanolatana hunatageana amamata hugahe vaageno ani amoanumaya anaya huno nomaafi anavaleno anategeana fayaa yafe Anumaya Kotia haoke hegeno ofaline.

³² Nagoa vayafena ayaayate kea ohugahue. Anumaya Kotife haviya amametiti humainaya kava vayamogami amakia Kiteonie Palakie Samusonie Yefatae Tevitie Samuelie naa vayala Anumaya Koti amaune vayafeenenenagina ayaayate maina ani kema hisua kanania omalene. ³³ Ani kasagoya vayamoya Anumaya Kotifena haviya amakupi maleya ametiti humainaya yafe kame vayaamia hamae hano humainae. Fatago kavakeya huya veatela kava yagai-mainae. Anumaya Kotia Tamamigahue. huno hu lokiya vai-malenea yana amamine. Nagi nagola kaveage afumo agia Laiyonie afugino Anumaya Kotife haviya

amametiti haya vayala hamaeno nakai-talegahe hianagi avaya Anumayamoalino tukiteneane. ³⁴ Nagoamogamina tusia atafi amasaga huya takigahe hayanagi Anumaya Kotia ani ata alisu humaine. Kame vayaamimoya ayaaya naepeleti hamaegahe hayanagi Anumaya Kotia hamaoke hemaine. Amakaila amayamufa omalegeno Anumayamoalii hetimateteno tokiyaage amayamufa amamigeya ati vayala amanati-mainae. ³⁵ Nagoa anemoya Anumayamofe haviya amametiti humainaya yafe vayaamima faliyana Anumaya Kotia fali-mainafitali ali hetimategeya eteya amavale-mainae. Kame vayamoya nagoamo-gamina nehamaea mage huya hae Anumaya Kotina tamakavenoma hutesayana otamahaeta afaa tama-talesunagetama notamilega ugahae. huya hayanagi mage hae Tamahaoteyatamigi tahaesageta faliteta haenaga hetita kanaleya huta maigahune. huya hageya hamayageya fali-mainae.

³⁶ Nagoamoya Anumayamofe haviya ametiti humainaya yateti kame vayamoya kigi hu neamateya hegi kayoteti hamaeya aeni nofiteti kimateteya kinafina amatenayane. ³⁷ Nagoamogamina yafa kayoteti hamayageya fali-mainae. Nagoamogamina tuteti hefatagi-lole hageya fali-mainae. Nagoamogamina ayaaya naepeleti amaugafafina aye kalo hageya fali-mainae. Nagoamogamina kenaamia omalegeya memene sipi sipiene augafaleti kenaamia hatiya fai-linae. Nagoamogamina kaveamiene faesaya noamiene afenoamiene omalegeya

kame vayamoya ali haviyana humatena. ³⁸ Nagoamoya koli faleya agoyafinagaene yafa kapinagaene mopafi kafi-malenaya komufinagaene vaya omai kame kotegaene falageyama vayana tusia kanale veanegiya naa humainayafe nagoa ma mopafi veanea ania huya fatago veanea omainayanagiya ani kanale veanenema maisayana oamategahie.

³⁹ Mukia ani veamoya kanale ya huya Anumayamofena haviya amakupina maleya amametitima humainaya kea nehavunanagi Anumaya Kotia Kanale yama hulamategahue. huno hu lokiya vai-malenea yana aupaa oamamigeya fali-mainae. ⁴⁰ Nayona Anumaya Kotia kanale yama hulatesia yana ago talo tala hulateneanagi hagoteyama mainaya veamoya ago aliteya tagasesaya yafena Anumaya Kotia ohaigeno oamamine. Nagopi mai lokaetesunageno Fatago veane mainae. huno hulategahie.

12

Yisasite age-maleta tametitia hisune.

¹ Mukia veamoya Anumayamofe haviya amakupi maleya amametiti hu-mainaya yana tagaila ago taveliteya faliyanagi siamoma hia kava huya tagaila mai kove humaineya nelagae. Naa nehayafe Anumaya Kotia taiya-yeta visuna katia tamineanagita ma mopafi yafema tagesa havi havi nehuna yamoene kefo yamoma nofi hulatenea yamoene aya aya kenamoma hia kava nehianagita taga huta alita aupa huteta

Anumaya Kotima tavelia katela tokiyaage huta taiya-yeta visune. ² Taiya-yeta neuta mukia yatela moge mege ohisunagi Yisasitekeya agelita visune. Yisasife havita tametiti hu-mainona yamona aepaaene augafaaene kanogino mage huno humaine Naipamoa muse yama alisiafe yafaga yosalela nahaeya asaigena fali-mainofe nagayema hia yana kana yanagi aka ya hane. huteno fali-maine. Faliteno hetino Anumaya Kotina aya tamaga kaiyaga, kava vayamoya nemaiya siale haino mainegi ani kanomona ageme gema haiho.

Anumaya Kotia tagayama fatago huta maisuna yafe kana yana nelamie.

³ Tamakaila kasalola otamahaeno. Yisasifena tamakesa havi havi hutama maiho. Kefo yama nehaya vayamoya Yisasina kame lagiya kae-tayanagi agaya tokiyaage huno mainea yafena tamakesa nehavitama tamahaumanamoa faki faki ohino. ⁴ Kefo yama hiho. huya aye lamavataga hageno tamakuamoa kana higetama Aao, kefo yana ohugahune. hutama hageya tamahayageno kolatamimoa higetama ofalinae. ⁵ Anumaya Kotia tamavaleteno nafaneyagaa-hema humainea kemoa tamake-kanio? Mage huno hu-maineane

Nafanenimoga Anumayamoa kaumonoma male-sigekahena Afa yane. huka ohuo. Ke negama-kino kayoma kamisiana kagaila kavaleno ali fatago hugatesia yafe nehigi kaipamoahaviyana ohino. ⁶ Anumayamoa ayamopafima nehaiya veala amaumono maleno ali fatago hu neamateno. Nagai

nafane maigahae. huno neamavalea veala
kayona neamamie. huno humainea kea
ohavinao?

⁷ Kana yama falote hisigetama Tamaumono malenoa kea havisae. huno Anumaya Kotia agaia nafanemogatama mainae huno ali fatago hu nelamategi tokiyaage hutama maiho. Mukia nafaneyaga neamafaya kayona amaumonola nemalaya yane. ⁸ Naa yanagino Anumaya Kotia tamakaila ani kavama hu otamateleasina agaia lamatenea nafane kana ohaleasinagi munamo nafanea, nefaa omai nafane kana hutama maileasine. ⁹ Ma mopafi nelamafaya tamaumono maleya kayo kevema lamamigeta amakima alisaga huta amakai kema ali hipoya nehuta nemaunanagi Anumaya Kotia tagu nafanemo nefaa maineanagita agai kea tayamuwaage huta ali hipoyama hinutahena kanaleya huta maigahune. ¹⁰ Ma mopafi nelafaya aupa kana kanoa amakaiami hamaiya avamete huya kayo kevea nelamiyanagi Anumaya Kotia kanale kava huno kava yagai-lateno agaia mainea avamete veala alu aotage veane maisuna yafe kayo kevea nelamie. ¹¹ Nelamia yamofe Kana ya nelamigi muse yatia omalegeno otahaiye. huta nehunananagi haenagaa ali fatagoma hulatenea kanafina augafaaene yamo a falu hisia yana falote hinageta keama ali hipoya nehisumogata fatago huta ani falu yapi maigahune.

Tayamuwa alita tokiyaage huta hetita maisune.

¹² Tamayamoma kalake kisigetamahena alipi hu-linetama aliyana aliho. Tamaleya

yama nelama-kesigetamahena ayepi humainetama tokiyaage hutama vaiyeho. ¹³ Tole lamakesa ohavitama tamaiya aye fatago hutama vaiyesayana nago kanomoa tole agesama havisia kanomona kanale hutesigenofena nagoke agesale maigahie.

¹⁴ Mukia veenanenena falu hutama maisaya yafe tamakesa nehavitama tamaya mukiki hutama alu aotage veane maiho. Fatago huya omaisaya veamoya Anumaya Kotina oagetafa huya oagegahae. ¹⁵ Anumaya Kotia kayone hisaya yamaa ago tamaminegi tamakaipiti nagoa veamoya ani yafema amakaveno humisaya yafena kayetama maiho. Nagoamoya kana ya amamigeno amaipamoa haviya higeno amaipafinaga atuage yosamoa hafuya ayetenonenaamoa atuage hia kava huno mukia veapina kana yamoalalote huteno tamakua alino haviya huno oniyaage hugahigi kayeho. ¹⁶ Kayetama mainetama Isoa nayoma humainea kavala ohiho. Isoa nagoke yupanesia kavefe haviteno mukia kanafima kanale yama alino maisia yama nefaa amisia yafena agesa ohavino Aoteyamaae. huno humainea kavala ohiho. Havigu nagoamogatama Anumaya Kotifena Haoteyamaae. hutama nehisagetama nagoamogatama alu kanomo anea amavayu ohiho. ¹⁷ Isoa haenaga agesamoa akalo higeno nefaa manuma amisia yafena tusiya huno avia ateanagi nefaa aganaamo ani manua ago amineanagino agua aiyahae huno Isona manuma amisia kamaa omalegeno manua oamine.

Tagaya ikapinaga hanea Yelusalemua ago

evayi hu-mainone.

¹⁸ Nayona Isaleli veamoya kahegi kema aligahena Sinai agoyamo aiyafi haiya maineya neageya ani agoyamona tusia ata neleno tusia kumayu hani kigeno yasimoa tusiya humaine. Tamakaya Anumaya Kotitega visayana tamayana avate hisaya yate ougahagi Isaleli veamogamima humatenea kavala hu otamategahie. ¹⁹ Nehigeno ufe kemoene nagoa kema huhaleno higeya haviya kehena koli huya Mosesefena Nagoene havisuna yafena notahaiye. huya humainae.

²⁰ Ani kemoa mage huno hu-maineane

Veaneo afuo ani agoyafima haino aiyakama ayesigetamahena ayana avate hugahe yafa kayoteti hamaegeya faliho. huno hu-maineane.

Na ke higeya haviteya tusia amamayo aimainae.

²¹ Mosesea ani amamayoma aiya yana agetenno mage hie Nagaienena ani yama neagogenoa namayo neaigeno tagi tagiyana nenage. huno hu-maineane.

²² Hu-maineanagi tamakaya haegafa huno mainea Anumaya Koti kumatela ago emainae. Ikapinaga hanea Saiyoni agoyale kimalenea Yelusalemua ago emainae. Ani kumatela ohavunamaa ensole vayamoya musena huya Anumayamo agia alisaga nehuya melitalu nehale ago emainae. ²³ Anumaya Kotia yage nafaneamoya amakua aiyahae hageno Anumaya Kotia amakia ikapinaga ago kae-malenea anaga mainale emainae. Mukia veamogamina kaiyekema hu neamatea Anumaya Koti maineleene Anumaya Kotife

haviya amakupi malageno Fatago veane mainae. huno humatenea veala hai ala veaneage maineya falitageno amaku nafanemoya ikapinaga haiya mainaleene ago emainae. ²⁴ Yisasia haegafama alino hagelafi-latenea kema alino falote humalenea kanoene kefo yatima aye hami-talenea kolamaamoene mainele ago emainae. Nayona Kenia aganaamona haegeno Epoloa fali-mainea kolamo Kenia kefo yama humainea anonaa aligahie. huno hu-maineanagi Yisasi kolamo ani kolana agase-mainea kolanagino mage hie Kefo yatamia ago aye hami-talenoe. huno humaine.

Anumaya Kotife tamayo ainageta kayeta maisune.

²⁵ Menima kema nehia kanomo kea, Yisasi kema, akavela omalesagi kayeho. Nayona Anumaya Kotia mopale kanoa Mosese avayafiti, kema higeya akavema omalaya veala kayo kevea amamineanagino menia ikapinagati ea kema nehia kanomo kea ohavinesamogatama tahaokela ohegahianagino tusia kayo tamigahie. ²⁶ Nayona Sinai agoyafiti ke nehigeno tusia imila ali-maineanagi menia mage huno hu lokiya vai-malene Nagoene mopaagela alina kosia ohugahugi ikaene alina kosia hugahue. huno humaineane. ²⁷ Nagoene. huno hia kemo aepaamoa maa humaine agaia talo hu-malenea yana alino kosi hinageno fanane hugahianagi fananema ohisia yamaa tokiyaage huno agola hanegahie.

²⁸⁻²⁹ Naama hisiafenagino lagaifena Kava yagai-lamatategahue. huno humainea kea havita lagupi malenona yana kosi kosi huno fananema

ohisia yafena tusia muse hisune. Anumaya Kotia kefo yafena aipamoata neleanagino ani atamoma mukia yama leno fanane nehia avamete kano maineanagita tamayoa neaita Anumaya Koti aipamoata kanale hisifa kavakeya huta agia alisaga higetao.

13

Nagoke nagozemogata nelafu-gamifena tahaisie.

¹ Yisasi kema haviya amakupi malenaya nelama-fugamina tamaipa amamiho. ² Natu veala noamakesaya veanema, kumatamile esagetamahena kanaleya hutama kava humateho. Nagoamoya naa vayafena Afa vayale. huya hayanagi ikapinagati aya ensole vaya amavaleya kava humatenayane. ³ Kina nopima mainaya veala tamakaiene ani veanene nemaiya avamete hutama amaya hiho. Ali haviya humataya veafena ania huya tagaila ali haviya hulatageno amaugafa amakata aiya avamete huno tagata neaye hutama amaya hiho.

⁴ Alavemo-gatama maisaya yana kanale yanagi anene munanenena vemogatama amavayu ohigeya ane munanemo-gatama vemogamina amavayu ohiho. Ani kavama hisagenoa Anumaya Koti kaiyekea hulamateno kayo keve tamamigahie.

⁵ Monema alisaya yafena hagaa oalitama afaa maiho. Malenesaya yafena tamaipamoata kanale hinagetama Nagoeane ani yana alisune. hutama ohiho. Anumaya Kotia mage huno hu-maineane

Nagaya nagela kanina otama-talegahuanagina
tamage huna tamaya hugahue. huno hu-
maineane.

⁶ Hu-maineanagita tole lagesa ohavisunagi
tokiyaage huta maineta mage hisune
Kolia ohugahugi Anumayamoanakaleya huno
naya nehigeya veamoya ali haviya hu
onategahae. huta hugahune.

Yisasi akave hisuna yafena tagaya ohisune.

⁷ Anumaya Koti kea tamahapai-mainaya mono
kava vayafena tamakesa haviho. Anumaya
Kotife haviya amakupi maleya kanaleya
huya vaiyeyama nemaiya kavamo falote
hia augafaaene yafena tamakesa havi havi
ne hutama Anumaya Kotife haviya amakupi
maleya amametiti nehaya avamete hutama
maiho. ⁸ Yisasi Kalaisia nayoene meniene
nagoke avamete hume hume haino agola
aniageya hugahie. ⁹ Naa nehiafe alu mono
kema tamahapaisageya havi kate tamavaleya
tamategahie hugahagi kayema ohaviho. Ma
kavela neho ma kavela oneho. huya haya
kema akave nemalaya kemoa tamaya ohugahae.
Kavemo nesunafe kahegi kemoa tagu tamena
alino kanale hu otategahigi Anumaya Kotia
kayone yamaaleti kanaleya huno alino tokiya vai-
lategahie. ¹⁰ Nayona mono note kava vayamoya
sipi pipi heya kae-salamana hu-mainaya yamo
alu kate umainayafe Yisasi kolamoa amaya
ohigeyaha onegahagi Yisasima yafaga yosalema
fali-mainea yana tama yanagita tagaya nenone.
¹¹ Mono note hagote kava kanomoa kefo yaamihe

sipi sipia hageno kolamaa alu aotage nopolinaga alino haiyaamo ailake hu-maleteno tamaa alino hati-lavino kegiyamoa malaga viaamo atafi mo kaeno fanane hu neataleane. ¹² Naama humainaya avamete huno Yisasia fali-mainea kolateti kefo yati aye hamiteno alu aotage veane maisayafene higeya kegiyamona malaga avaleya agaye hisifa kavala mo hutageno agata neaigeno fali-maine. ¹³ Naa hu-maineafe tagayaenena ania huta kegiyamona malaga Yisasite vigetao. Agaima ali haviya hutenaya yana tagaienena tagaye hisifa kavala hulateya ali haviya hulatesae. ¹⁴ Tagaya agola maisuna kumala ma mopafina omalegi ikapinaga agola maige maige hisuna kumate haenaga haisuna yafe nelahaigeta agava mainone. ¹⁵ Yisasia tagaife huno fali-mainea yatetila Anumaya Kotina muse yama amigahena sipi sipia hetu oamigahunagi mukia kanafina tavayafiti Agaife havina nagupi malenoe. huta hu falote nehuta Anumaya Koti agia alisaga huge huge higetao. ¹⁶ Nehutama veala ali kayone humatetama malenesaya yapitila veama amamisayana Anumaya Kotina muse ya amisageno aipamoa kanale hugahie.

Anumaya Kotia taya hinageta kanaleya huta maigahune

¹⁷ Kava vayamogami kea havitama ali hipoya nehutama amakai amaiyaafi maiho. Anumaya Kotia tamaku tamamete kava hisaya yafe ali hetimateno aliyana amamineanagi haenagaa tamakaifena hamavi-gegahie. Hamavi-gesigeya tamakaila muse hisaya kema hisagetama

tamakaienena muse hugahayanagi amaipamoa kanalema ohisiana tamaya ohugahie.

¹⁸ Tagu tagesa havunana kefo yatia oma-leanagita Anumaya Koti agima alisaga hisuna yafene huta mukia kanafina kanale kavakeya huta hisuna yafene hutama Anumayamotega tagaifena nunamupiti havigeho. ¹⁹ Tamakayaene umaisuafene huna nehugi Anumayamoma naya hisiafe nunamupiti havigeho.

²⁰ Anumaya Kotia taipa falu hisia yamona aepaa maineno alino hagelafi-latea kemoa tokiyaage huno hanege hanege hisia yafenagino Yisasima fali-mainea kolamo a ilaki-lavigeno Anumaya Kotia Yisasina fali-mainefti alino hetitene. Ali hetitegeno sipi siple kava kanoa tusia ala kava kanoti maine. ²¹ Maineanagina tamakaifena mage huna Anumayamotega havinegoe. Yisasi Kalaisima hulatenea yafena Anumaya Kotia tamakupina aliyamaa aliteno agaia hisia kavama hisaya tokiya tamamisie huna havinegoe. Yisasi Kalaisi tokiya hale yamo agia hanege hanege hanesia yafe alisaga higetao huna nehue. Tamage.

Kemoa mo hano hisia ke.

²² Nenafu-gatama tokiyaage hutama maisaya yafe ayaaya kea okaenogi musetami nehugi tamakaya havitama akave maleho. ²³ Nelafua Timotina nofipiti kalu heya atalageno umaine-gena tamahanepauve. Aupaama nagaitega es-i ana tokaetaa mo lamakegahue.

²⁴ Kava vayatamiene Anumaya Koti anagaaene hu falu fala kenia humateho. Itali kotegati ataleya aya veamoya tamakaila ania huya hu falu fala hu nelamatae.

²⁵ Anumaya Kotina kayone yamaamoa mukiamo-gatamiene hanesie. Tamage.

**Anumayamo'a Haegafa Alino
Hagelafilatenea Kea
The New Testament in the Kanite Language of Papua
New Guinea**

Nupela Testamen long tokples Kanite long Niugini
copyright © 2002 Wycliffe Bible Translators, Inc.

Language: Kanite

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.
Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2021-04-21

PDF generated using Haiola and XeLaTeX on 11 Nov 2022 from source files
dated 30 Nov 2021

55807fd5-1005-5405-89da-5533a7950c65